

D.R. 39/2023

RANG UNDANG-UNDANG

b e r n a m a

Suatu Akta untuk meminda Akta Universiti dan Kolej Universiti 1971.

[]

DIPERBUAT oleh Parlimen Malaysia seperti yang berikut:

Tajuk ringkas dan permulaan kuat kuasa

1. (1) Akta ini bolehlah dinamakan Akta Universiti dan Kolej Universiti (Pindaan) 2023.

(2) Akta ini mula berkuat kuasa pada tarikh yang ditetapkan oleh Menteri melalui pemberitahuan dalam *Warta* dan Menteri boleh menetapkan tarikh yang berlainan bagi permulaan kuat kuasa peruntukan yang berlainan Akta ini.

Penggantian seksyen 15A

2. Akta Universiti dan Kolej Universiti 1971 [*Akta 30*], yang disebut “Akta ibu” dalam Akta ini, dipinda dengan menggantikan seksyen 15A dengan seksyen yang berikut:

“Majlis Perwakilan Pelajar atau badan pelajar boleh membuat, dsb., pungutan wang atau menerima wang atau sumbangan lain

15A. (1) Majlis Perwakilan Pelajar Universiti atau mana-mana badan pelajar Universiti boleh, tertakluk kepada mana-mana undang-undang bertulis, membuat, menganjurkan atau mengambil bahagian dalam apa-apa pungutan wang atau menerima wang atau apa-apa sumbangan lain daripada mana-mana orang atau kumpulan orang.

(2) Dalam membuat atau menganjurkan atau mengambil bahagian dalam apa-apa pungutan wang atau menerima wang atau sumbangan lain daripada mana-mana orang atau kumpulan orang di bawah subseksyen (1), Majlis Perwakilan Pelajar Universiti atau badan pelajar Universiti hendaklah mematuhi peraturan-peraturan sebagaimana yang ditetapkan oleh Lembaga.

(3) Tiada seorang pun pelajar Universiti boleh membuat, menganjurkan atau mengambil bahagian dalam apa-apa pungutan wang atau menerima wang atau apa-apa sumbangan lain daripada mana-mana orang atau kumpulan orang melainkan jika pembuatan atau penganjuran atau pengambilan bahagian dalam pungutan wang itu atau penerimaan wang atau apa-apa sumbangan lain itu adalah atas nama atau bagi pihak Majlis Perwakilan Pelajar Universiti atau mana-mana badan pelajar Universiti.

(4) Mana-mana pelajar Universiti yang melanggar subseksyen (3) boleh dikenakan tindakan tatatertib.”.

Pindaan seksyen 16B

3. Seksyen 16B Akta ibu dipinda—

- (a) dalam subseksyen (1), dengan menggantikan perkataan “Naib Canselor” dengan perkataan “Jawatankuasa Tatatertib Pelajar yang ditubuhkan oleh Lembaga”;
- (b) dalam subseksyen (2), dengan menggantikan perkataan “Naib Canselor yang” dengan perkataan “Jawatankuasa Tatatertib Pelajar yang”;

- (c) dengan memasukkan selepas subseksyen (2) subseksyen yang berikut:

“(2A) Jawatankuasa Tatatertib Pelajar hendaklah mempunyai sekurang-kurangnya tiga orang ahli yang terdiri daripada Timbalan Naib Canselor sebagai pengerusi dan pekerja Universiti yang dilantik oleh Lembaga.”;

- (d) dengan memotong subseksyen (3);

- (e) dalam subseksyen (3A), dengan menggantikan perkataan “Naib Canselor, atau Timbalan Naib Canselor, pekerja atau jawatankuasa pekerja yang diwakilkan dengan fungsi, kuasa atau kewajipan di bawah subseksyen (3),” dengan perkataan “Jawatankuasa Tatatertib Pelajar”;

- (f) dalam subseksyen (3D), dengan menggantikan perkataan “Naib Canselor, Timbalan Naib Canselor, pekerja atau jawatankuasa pekerja, mengikut mana-mana yang berkenaan,” dengan perkataan “Jawatankuasa Tatatertib Pelajar”;

- (g) dalam subseksyen (4), dengan menggantikan perkataan “Naib Canselor, Timbalan Naib Canselor, pekerja atau jawatankuasa pekerja, mengikut mana-mana yang berkenaan,” dengan perkataan “Jawatankuasa Tatatertib Pelajar”; dan

- (h) dengan menggantikan subseksyen (8) dengan subseksyen yang berikut:

“(8) Tiada seorang pun ahli Jawatankuasa Tatatertib Pelajar boleh menjadi ahli Jawatankuasa Rayuan Tatatertib Pelajar.”.

Pindaan Jadual Pertama

4. Jadual Pertama kepada Akta ibu dipinda—

- (a) dalam seksyen 48—

- (i) dalam subseksyen (4), dengan menggantikan perkataan “satu tahun” dengan perkataan “satu tahun akademik”;

- (ii) dengan memasukkan selepas subseksyen (4) subseksyen yang berikut:

“(4A) Walau apa pun subseksyen (4), Lembaga boleh mengurangkan atau melanjutkan tempoh keahlian MPP dan pemegang jawatannya.”;

- (iii) dengan memotong subseksyen (11);

- (iv) dengan memasukkan selepas subseksyen (11) sebagaimana yang dipotong subseksyen yang berikut:

“(11A) Universiti boleh menubuhkan apa-apa kumpulan wang atau memiliki apa-apa harta untuk diuruskan atau disenggara oleh MPP mengikut tatacara kewangan Universiti.

(11B) Walau apa pun subseksyen (11A), MPP boleh, tertakluk kepada mana-mana undang-undang bertulis, menubuhkan, menguruskan atau menyenggara apa-apa kumpulan wang mengikut cara sebagaimana yang ditetapkan dalam peraturan-peraturan yang dibuat oleh Lembaga.”; dan

- (v) dengan memasukkan selepas subseksyen (12) subseksyen yang berikut:

“(12A) Bagi maksud seksyen 15A Akta Universiti dan Kolej Universiti 1971, Lembaga boleh membuat peraturan-peraturan untuk menetapkan cara bagi pembuatan atau penganjuran atau pengambilan bahagian dalam pungutan wang atau penerimaan wang atau sumbangan lain oleh MPP.”; dan

- (b) dalam subseksyen 49(2), dengan menggantikan perkataan “(11), (12) dan (13)” dengan perkataan “(11), (11A), (11B), (12), (12A), (13) dan (14)”.

Kecualian

5. Semua prosiding tatatertib yang diambil terhadap pelajar-pelajar Universiti yang telah dimulakan dan masih belum selesai di hadapan Naib Canselor, Timbalan Naib Canselor, pekerja Universiti atau jawatankuasa pekerja Universiti, mengikut mana-mana yang berkenaan, hendaklah, pada tarikh permulaan kuat kuasa Akta ini, terus diuruskan oleh Jawatankuasa Tatatertib Pelajar di bawah Akta ibu sebagaimana yang dipinda oleh Akta ini.

HURAIAN

Rang Undang-Undang ini bertujuan untuk meminda Akta Universiti dan Kolej Universiti 1971 ("Akta 30").

2. *Fasal 1* mengandungi tajuk ringkas dan peruntukan mengenai permulaan kuat kuasa Akta yang dicadangkan.

3. *Fasal 2* bertujuan untuk menggantikan seksyen 15A Akta 30 untuk membenarkan pungutan wang dan penerimaan wang dan sumbangan lain oleh Majlis Perwakilan Pelajar dan badan pelajar Universiti yang ditubuhkan di bawah seksyen 48 dan 49 Jadual Pertama kepada Akta 30 masing-masing. Dengan pindaan ini, Majlis Perwakilan Pelajar Universiti dan mana-mana badan pelajar Universiti boleh, tertakluk kepada mana-mana undang-undang bertulis, membuat, menganjurkan atau mengambil bahagian dalam apa-apa pungutan wang atau menerima wang atau apa-apa sumbangan lain daripada mana-mana orang atau kumpulan orang mengikut cara sebagaimana yang ditetapkan dalam peraturan-peraturan yang dibuat oleh Lembaga. *Fasal* ini juga memperuntukkan bahawa tiada seorang pun pelajar Universiti boleh membuat, menganjurkan atau mengambil bahagian dalam apa-apa pungutan wang atau menerima wang atau apa-apa sumbangan lain daripada mana-mana orang atau kumpulan orang melainkan jika pembuatan atau penganjuran atau pengambilan bahagian dalam pungutan wang atau penerimaan wang atau apa-apa sumbangan lain itu adalah atas nama atau bagi pihak Majlis Perwakilan Pelajar Universiti atau badan pelajar Universiti.

4. *Fasal 3* bertujuan untuk meminda seksyen 16B Akta 30 untuk memperuntukkan bahawa pihak berkuasa tatatertib Universiti berkenaan dengan tiap-tiap pelajar Universiti bukanlah lagi Naib Canselor tetapi Jawatankuasa Tatatertib Pelajar. Jawatankuasa Tatatertib Pelajar hendaklah mempunyai sekurang-kurangnya tiga orang ahli yang terdiri daripada Timbalan Naib Canselor sebagai pengerusi dan pekerja Universiti yang dilantik oleh Lembaga.

5. *Fasal 4* bertujuan untuk meminda Jadual Pertama kepada Akta 30. Di bawah *fasal* ini, seksyen 48 Jadual Pertama dipinda untuk memperuntukkan bahawa pemilihan ahli Majlis Perwakilan Pelajar dan pemegang jawatannya hendaklah bagi tempoh satu tahun akademik dan tempoh keahlian tersebut boleh

dikurangkan atau dilanjutkan oleh Lembaga. Pindaan ini juga memperuntukkan bahawa Universiti boleh menubuhkan apa-apa kumpulan wang atau memiliki apa-apa harta untuk diuruskan dan disenggara oleh Majlis Perwakilan Pelajar dan Majlis Perwakilan Pelajar boleh, tertakluk kepada mana-mana undang-undang bertulis, menubuhkan, menguruskan atau menyenggara apa-apa kumpulan wang mengikut peraturan-peraturan sebagaimana yang ditetapkan oleh Lembaga.

6. *Fasal 5* bertujuan untuk mengadakan peruntukan kecualian.

7. Pindaan lain yang tidak diperkatakan secara khusus dalam Huraian ini merupakan pindaan kecil atau berbangkit.

IMPLIKASI KEWANGAN

Rang Undang-Undang ini tidak akan melibatkan Kerajaan dalam apa-apa perbelanjaan wang tambahan.

[PN(U2)3336]